


中國古典文學基本叢書

呂留良詩箋釋

第四冊

中華書局



中國古書分類學

卷之十

新編中國古書分類學

目錄

中國古典文學基本叢書

呂留良詩箋釋

第四冊

俞國林 撰

中華書局

何求老人殘稿卷六

東將詩 二十七首

康熙二十一年壬戌九月初二日，晚村偕門人馬允彭、董采、陳鏞、嚴鴻達、查樞及長子公忠、從子至忠乘舟東游。三日，至海寧，訪陳翼，不遇；晚至玉虛道院，欲觀海棠，因園丁索錢，亦不得入。四日，游金粟，至邵彎訪何商隱，重過湖天海月樓。五日，同商隱及門人等登雲岫，尋仰天塢瀑布，采水玉蓮。六日，同商隱游漱浦，登青山石壁觀潮，晚飲吳汝典書屋。七日，訪胡令修，觀書。八日，游秦駐山，同商隱飲朱或賓樹滋堂。九日，集飲裴健飛小齋。十日，夜泊海鹽；是日董采因兄病先歸。十一日，復至朱或賓樹滋堂清話。十二日，坐舟中，商隱餉蟹麪。十三、十四兩日，集飲張小白涉園，鈔書。十五日，門人馬允彭、從子至忠歸。十六日，送商隱返半邇，集飲曹希文廉讓堂。十七日，集飲俞漢乘海樹堂，同席有余懷。十八日，海塘觀潮。十九日，登天寧寺塔。二十日，歸，夜抵南陽村莊。

按，關於此次出游之時間，由於何聚仁所撰何商隱先生年譜隸於二十年辛酉，茲引出學者考證。卞僧慧先生曰：「石印本呂晚村詩集東將詩注『壬戌』。卷中登天寧寺塔詩注有『弱水東指彭、臺言，鄧林指滇、黔言。時滇、黔已先一年滅，已而彭、臺至次年亦覆沒』等語。以吳世璠之亡在辛酉，鄭克塽之降在癸亥計之，此注皆就是游在壬戌而言，當無可疑。惟何聚仁輯何商隱先生年譜『二十年辛酉六十四歲』條：『九月，恥齋來訪，偕入萬蒼山，遂道海鹽而歸。』並引何汝霖文集與姚攻玉書『前月恥齋父子及諸高弟東來，盤桓幾二旬，登臨嘯歌頗暢』，當即此行，而繫年早一年。何氏集未見，附志於此，待考。」（呂留良年譜長編卷一一）然則此次出游，實是康熙二十一年事。何聚仁所據商隱與姚攻玉書又云：「震澤凶問，惛怛靡寧，相繼晤幾臣父子，審知二九兄爲之主持，可謂存歿有託。」（紫雲先生遺稿）所謂「震澤凶問」，即指王寅旭之逝，王濟王曉菴先生墓誌謂「卒於康熙壬戌九月十八日」（凌淦松陵文錄卷一六）。據此，則晚村出游之時可定矣。

九月二日同馬允彭籛侯董采載臣陳縱大始嚴鴻達賡

臣查樞左旋大兒公忠從子至忠放舟東游

老病感觸多，細碎氣上逆^(一)。知非攝生理^(二)，微動悔已積^(三)。諸子憫吾衰，扶攜事游歷。澤國久雨後，浦溆水充斥。村艇宛轉通，野釣高低格^(四)。日出雲物高，露光百草滴。木葉聲肅然^(五)，未露顛顛跡。誰抱不凋姿，霜雪行相益。舉酒共斟酌，長幼以次及。揖讓見古歡，脫略非真適^(六)。對此意欣然，不覺夙疾釋^(七)。洵知守舍翁，不如遠游客。

【箋釋】

此詩作於康熙二十一年壬戌九月初二日。

按，晚村素有咯血之病，公忠行略曰：「幼素有咯血疾，方亮功之亡，一嘔數升，幾絕。辛亥以後，遇意有拂鬱，輒作。至庚申夏，方對客語，而郡劄適至，噴嚏滿地，坐客咸愕然，自後病益

劇。」嚴鴻逵親炙錄曰：「壬戌正月，見先生於驛司橋舟中。先生曰：『去歲幾登鬼錄，今自分必得危證，不久於人世矣。』於是，諸子慫恿出游，覽澈湖、雲岫之勝，詩言「諸子憫吾衰，扶攜事游歷」云者，即此也。陳梓姚蟄菴先生遺言曰：「向嘗從何、呂兩先生入澈湖山中，雲耜方巾，東莊僧帽，僕則氈冠布袍。道上人私謂：『此鄉人請一僧一道，不知念甚經也。』相與一笑。俯仰間，今已爲陳跡，可慨也。」（陳一齋先生文集卷五）蓋亦指此行。

同游諸子，馬允彭、錢侯、董采、載臣、陳縱、大始、嚴鴻逵、廣臣、查樞、左旋，皆晚村門人，吳孟舉寒夜讀書歌爲陳大始作有「用晦弟子十百人」之謂（黃葉村莊詩集卷五）。茲分述如左。

馬允彭，字錢侯，生平不詳。吳孟舉有秋晚與馬錢侯泊舟閭門談飲甚適爲畫扇頭墨竹並綴二絕，一曰：「竹亭散髮受風輕，便想孤篷掠水聲。今日舟中玩風水，蕭疏疑向竹間行。」二曰：「雲絮水紋相俯仰，菰花蔣葉互縱橫。孟婆慚愧醜奢願，一日蒲颿兩日程。」又有錢侯會弔入城乘風先行再次前韻二首，一曰：「兩船相去只數丈，風急不聞歌嘯聲。篷腳忽從城曲轉，船頭招手送船行。」二曰：「弔喪問疾聊爾爾，百計驅人胸次橫。白馬素車吾爽約，高桅風正且貪程。」（黃葉村莊詩集卷五）

董采，字力民，又字載臣，號廢翁，董杲字方白之弟，雨舟之子。晚村高足，勞書升贈同里董載臣有「東莊諸弟子，董生最超特。晚村如昌黎，生殆過籍湜」（靜觀堂詩集卷二）之譽。吳容大

唐四家文序曰：「力民係予同里故交，其爲人勤勤懇懇，長於論說，而瀾翻峽倒，無非儒先義指與作家妙諦。年來講席所敷，自吳越及於魯衛，又次及於趙魏之東，恒、代之北，使荒陬絕塞，後生末學，無不知有南陽之教，尊而奉之。力民之爲功於師門，亦云偉矣。」（董采評點呂選唐四家文卷首）載臣於表彰晚村之學，不遺餘力。後策劃朱三太子案，震動朝野。卜伯耕先生曰：「李恕谷先生年譜屢及董采。觀其「君拾道學之迂儒，而冀輕俠之妄動」（康熙四十年辛巳），「冒道學而負時文」（四十七年戊子），可知四十年初晤時，董采已將密謀告李據。李據雖曰「斥而遠之」，曰「形跡分明」，未必預其事。及其案發，亦在知情不報之列。故深以得「脫然事外」爲幸。」（呂留良年譜長編卷一三）著有始學齋遠游草四卷、後遠游草一卷、西塘偶證一卷。

陳縱，字大始，陳定九陳大始傳曰：「陳大始，名縱，湖州德清人。博學，通詩古文辭，善書法。舉諸生。從呂晚村講程朱，學有所得。性耿介，疾惡甚嚴，朋友稍不合義，即大聲疾呼，辯論之。」（留溪外傳卷四）陳大始自謂：「縱自甲寅歲受業於先生之門。」（四書講義卷首呂晚村先生四書講義序）獄案興時，未見大始蹤跡，抑或卒矣。

嚴鴻逵，字廣臣，號寒村，吳興人。生於清順治十一年甲午，其受業時間或在晚村買得妙山之後。曾爲晚村詩集作釋略一卷，藉此始可讀晚村之詩。一生服膺晚村之學，亦頗有聞名。據李衛奏摺：「嚴廣臣一犯，原名嚴鴻逵，更因竊有理學虛譽，曾爲大學士朱軾所薦。前觀風整俗

使王國棟在浙時，又訪聞其人學問素優，因病未曾赴京，給匾獎勵。是以臣從前，亦據地方官稟聞，給有一匾。……據嚴廣臣供「名嚴鴻逵，歸安生員，年七十四歲。無子無孫，在家教書行醫。向日與曾靜從不相識。雍正五年八月內，有湖廣人張熙來訪其師呂晚村後人，書籍，自呂處到伊家求道，稱係曾靜門人，伊師在楚講學，有徒二十餘人，稱爲蒲潭先生。張熙以孔子擬其師，而儼然以顏子自居。與之辯論易經、性理、太極等類，見其學問平常，未免有譏貶之語。十一日張熙口稱欲往江寧尋訪廖姓之友，我因門人沈在寬現於江寧車鼎豐家教書，車家也是湖廣人。原作一字令其往見，不過使知我之門徒學問尚高於彼之意，還有兩首詩贈彼去的。張熙並不曾向我說及悖逆之事，雖稱道廖姓少年奇才，語言稍覺狂妄，我忘記名字了。但我一生迂腐守拙，實沒一些本領，人人皆知。況雍正元年經大學士朱軾薦我留心理學，曾蒙皇恩著在明史館編輯。部文來時，我因病告了寬限，不能進京。且我家姪子嚴德泳、嚴民法都係進士做官的。我是垂死孤獨之人，如何還有謀逆」等語。臣隨將伊家搜出之日記檢閱，上年八月初五等日之下，果有記載張熙到家之處相符。又查雍正元年十月間，巡按衙門果有準禮部咨取嚴鴻逵及覆部告病寬限之文，與所供無異。」（轉引自卞僧慧呂留良年譜長編卷一四「雍正三年乙巳」、「雍正五年丁未」兩條）呂案定讞時，刑部等衙門議奏曰：「逆賊嚴鴻逵，梟獍性成，心懷叛逆，與呂留良黨惡共濟，誣捏妖言，實覆載所難容，爲王法所不貸。嚴鴻逵應凌遲處死，已伏冥誅，應戮屍梟示。其祖父子孫兄弟及伯叔

父兄弟之子，男十六以上皆斬立決，男十五以下及嚴鴻逵之母女妻妾姊妹，子之妻妾，俱解部給功臣之家爲奴，財產入官。」旨曰：「嚴鴻逵著戮屍梟示，其孫著發寧古塔給與披甲人爲奴。」（王先謙東華錄雍正十年十二月）著有朱子文語纂編十四卷，傳於世，四庫全書收入存目子部類（編修勵守謙家藏本），著錄曰：「不著編纂者名氏。其書取朱子文集、語類約略以類相從，而不分門目，前後亦無序跋，蓋草創未完之本也。」今此書有傳者，前有嚴鴻逵、車鼎豐序，嚴鴻逵序稱「稿凡數易，閱十年，癸巳之秋甫就稿，楚邵車遇上自金陵來，見之便攜歸謄寫，且約將付諸梓。……因更與遇上反復商訂而出之」。蓋獄發後，人不欲毀其書，故將嚴、車二序去之以存（四庫所收書中此類情況頗多）。

查樞，阮元兩浙輶軒錄卷一二：「查樞，字階六，號左旋，海寧人。著慎踰集。」並引選佛詩傳曰：「叔祖口吃而好學，不求聞達，五經、三史，皆能熟記。詩宗昌黎，當其得意，頗稱神似。」錄和陶擬古詩一首曰：「戶庭長不出，天地時獨游。飄然萬物表，俯視小九州。脫屣乘長風，濯纓臨清流。塵緣紛且濁，緬想歸丹丘。如何不決去，仰止孔與周。俛焉追逸駕，富貴非所求。」

大兒公忠，又名葆中，字無黨，號冰葭，康熙四十五年丙戌科一甲二名進士，次年冬卒。王夔聞同年張陽朔爾羽卒官因感呂編修無黨朱翰林字綠同學趙河南豐原今年相繼徂謝四首之第二

首曰：「更有呂編修，江東曾獨秀。讀盡朱門書，講堂待擊扣。餘事爲清吟，亦在坡谷右。科名第二人，榜下尊者舊。胡爲謝蓬山，廣陵不復奏。廣柳出國門，白楊啼白晝。人生如風鏡，世情空雜糅。何處是山陽，腹悲燕市又。」（二十四泉草堂集卷七）劉廷璣曰：「京師爛熳衎衎亦不利於榜眼，居停而卒於其地者：戊辰榜眼查荆川嗣韓，丙戌榜眼呂無黨葆中。」（在園雜志卷一）至於無黨之死因，雍正則以爲「一念和尚謀叛之案，黨羽連及呂葆中。……而葆中遂憂懼以死」（王先謙東華錄雍正七年五月乙丑），此殆亦假託之辭也。

從子至忠，又名至中，字仁左，晚村四兄瞿良字念恭之子。張考夫言行見聞錄曰：「念恭沒時，遺孤方一歲，比長，用晦教育夾持，同於己子。」（楊園先生全集卷三四）公忠諭家人帖跋曰：「從弟至忠，字仁左，四伯父耕道先生之子。少孤，先君子教撫之。偶惑一妓，遂至流蕩。先君子嚴加禁督，始而懟憤，終乃悔悟，末年翻更勤儉，家賴以不破焉。」（呂晚村先生家書真蹟卷四）

【資料】

金張二十三日喜呂無黨過談次韻：不負名儒兒，畢竟持論正。古井托寸心，無波徹底淨。吉凶悔吝生，在動不在靜。披靡草上風，獨活一支勁。轉才遠嫌疑，慎獨學主敬。幾州鐵鑄錯，衆亦爲我病。窮達不介懷，人生各有性。傳說俞陳芳，名羶蠅集競。半途決絕之，不肯踏虎窠。

智勇輸此君，爾我僅安命。陳芳頭場已過，浮論騰涌，毅然不進二場。（齊老編年詩鈔癸酉）

范芳聞仁左舉孫：記得我兒湯餅會，諸公開飲婦翁樽。郭水容、曹叔則、呂念恭、呂莊生，聚飲顧氏小樓，各賦詩。養來兒女皆成鬼，口授門生看長孫。詩伯合圍心每怯，睡鄉往返脚初溫。肉消分寸能無悶，欲起尊公細比論。（閩餘子續集戊辰詩）

范芳、呂仁左歸舟見過言徐竹坡今在語溪詩約相會：愈衰愈老愈伶仃，猶及餘生見故人。我向無家依朋友，爾今何處是君親。彼時豈料至今日，此後定應爲別身。四十餘年泡幻過，許歸堂裏悟前因。

緇衣雅好闢村莊，黃葉村莊。不減崑山舊草堂。朱陸分疏南郭呂，用晦。宋唐升降剡溪黃。晦木。踏歌不閉城西月，送酒常攜雨裏香。天上輕綃安夜榻，只愁好夢破詩狂。（閩餘子續集己巳詩）

曹度在病聞呂仁左訃哭之：四十六年前，哭子喪所親。四十六年後，哭子並先身。彈指數十年，忽見兩世因。而我獨何爲，離居久逡巡。白髮秋風裏，病骨悲故人。哀哉老淚流，思見非難循。

昔哭親有故，子生半載耳。今哭子以時，堂前兩賢子。鱗甲已攢張，頭角露鬚髻。得時風雷動，池中非其委。薪盡火有傳，琴書熾然起。子當含笑行，地下弗倚徙。（帶存堂詩集）

【注釋】

〔一〕氣上逆：史崧校正靈樞經卷七：「黃帝曰：『何以候柔弱之與剛強？』少俞答曰：『此人薄皮膚，而目堅固以深者，長衝直揚，其心剛；剛則多怒，怒則氣上逆，胸中畜積，血氣逆留，臄皮充肌，血脈不行，轉而爲熱，熱則消肌膚，故爲消瘴，此言其人暴剛而肌肉弱者也。』」

〔二〕「知非」句：劉義慶世說新語任誕：「劉伶病酒，渴甚，從婦求酒。婦捐酒毀器，涕泣諫曰：『君飲太過，非攝生之道，必宜斷之。』」

〔三〕「微動」句：周易繫辭上：「亢龍有悔。子曰：『貴而無位，高而無民，賢人在下位而無輔，是以動而有悔也。』」

〔四〕野約：蘇軾過溪亭：「身輕步穩去忘歸，四柱亭前野約微。」約，廣韻卷五：「之若切。約：橫木渡水。」

〔五〕「木葉」句：屈原湘夫人：「嫋嫋兮秋風，洞庭波兮木葉下。」朱熹客舍聽雨：「遙想山齋夜，蕭蕭木葉聲。」

〔六〕脱略：江淹恨賦：「脱略公卿，跌宕文史。」李善注：「杜預左氏傳注曰：脱，易也。賈逵國語注曰：略，簡也。」張銑注：「脱略，輕易；跌宕，放逸也。」令狐德棻周書卷三八柳虬傳：「虬脱略人間，不事小節，弊衣疏食，未嘗改操。」

〔七〕夙疾：孟子盡心上：「孟子曰：『人之有德慧術知者，恒存乎疾疾，獨孤臣孽子，其操心也危，其慮患也深，故違。』」楊慎寄嚴維中：「伊子嬰夙疾，塊然慕朋歡。」疾，丁度集韻卷五：「丑刃切。疾：病也。」

三日至海寧尋陳敬之不遇 三首

停橈斷堰傍，爲問龍山友。曰既山中人〔一〕，城裏復何有。

可憐楊子雲，閉門無酒至。自投有酒家，欄圈說奇字〔二〕。

屏息划漿兒，紛紛車馬過〔三〕。深山古鑊頭，尋人或半箇〔四〕。

【箋釋】

此詩作於康熙二十一年壬戌九月初三日。

按，陳敬之，名翼，字敬之，號敬齋，海寧人。陳乾初確子。潘衍桐兩浙輶軒續錄引杭郡詩

三輯曰：「敬齋至性過人，嘗侍母氏厥疾，目不交睫者三月。父乾初先生，晚年病拘攣，必抑搔拊

摩少安。飲食起居，悉需人，敬齋臥床第旁，晝夜不離。隆冬盛暑，微聞所喚，即起立問所需，十二年如一日。弟患癰，潰決，日親洗拭之，至觸穢氣，生腰疽，幾不起。弟歿，爲弟嗣從姪以慰。嫠婦，析產與之，並撫其孤女。生平爲文，由穠鬱而蒼老，而清真，古今體排律絕句約萬首，賦序論說傳記書贊雜文約千首。嘗論：「學者讀書時，不可著一毫己見，作文時，不可著一毫規撫古人之見。」非深於文者不能爲是言也。然終不以文炫世。無心進取，畢其身不赴一試，樵蘇不爨，怡然自得。」（卷一）

【資料】

陳翼贈張元翁：先生海國獨高風，歷劫還知道未窮。老去行吟同澤畔，星明處士識江東。酒尊陶令風流遠，易象姬文夢寐中。白髮自堪頻晤對，離懷何必怨飛蓬。（兩浙輶軒續錄卷一）

黃宗羲陳乾初先生墓誌銘初稿：先生諱確，字乾初。……晚得拘攣之疾，不下床第者十五年。……子二人：長翼；次禾，歿。……翼字敬之，侍疾能盡其誠，先生可謂不死矣。（南雷文

案卷八）

【注釋】

〔一〕 山中人：屈原九歌河伯：「山中人兮芳杜若，飲石泉兮蔭松柏。」王逸注：「山中人，屈原自謂也。言己雖居在山中無人之處，猶取杜若以爲芬芳，飲石泉之水，蔭松柏之木，飲食居處，動以香潔自修飾。」

〔二〕 「可憐」四句：班固漢書卷八七揚雄列傳：「王莽時，劉歆、甄豐皆爲上公，莽既以符命自立，即位之後欲絕其原以神前事，而豐子尋、歆子棻復獻之。莽誅豐父子，投棻四裔，辭所連及，便收不請。時雄校書天祿閣上，治獄使者來，欲收雄，雄恐不能自免，乃從閣上自投下，幾死。莽聞之曰：「雄素不與事，何故在此？」問請問其故，乃劉棻嘗從雄學作奇字，雄不知情。……雄以病免，復召爲大夫。家素貧，耆酒，人希至其門，時有好事者載酒肴從游學。而鉅鹿侯芭常從雄居，受其太玄、法言焉。」王充論衡佚文篇：「揚子雲作法言，蜀富人賈錢千萬，願載於書。子雲不聽。夫富無仁義之行，園中之鹿，欄中之牛也，安得妄載！」

〔三〕 「紛紛」句：趙振文和葉水心馬騰歌：「昔年家住長安里，春風盡日香塵起。紛紛車馬過綺陌，買花人多少人識。」

〔四〕 「深山」二句：釋普濟五燈會元卷五：「德誠禪師囑（山）曰：「汝向去直須藏身處沒蹤跡，沒蹤跡處莫藏身。吾三十年在藥山，只明斯事，汝今已得，他後莫住城隍聚落，但向深山裏，鑿頭

邊，覓取一個半個接續，無令斷絕。」

晚泊玉虛道院游名園欲觀海棠園丁索錢不得人悵然放船〔一〕

曾聞老友爭題詠，國色天香擁畫樓〔二〕。今日我來無一箇，他年此話或千秋。鮫宮深鎖妃長恨〔三〕，蟻垤旋封客細愁〔四〕。吳苑洛園誰把翫〔五〕，尼菴道院儘悠游。一作：「眼底廢興碁局變，尼菴道院舊風流。」○茲地爲徐大竹故居，海棠其舊物也。外有香谷菴及玉虛道院，皆古跡，今猶存。

【箋釋】

此詩作於康熙二十一年壬戌九月初三日。

按，友硯堂記曰：「從子婿徐大竹適至，於舊簾得亮功遺稿一帙見畀。」（呂晚村先生文集卷六）徐大竹，即徐有兼，查繼佐諸生挂扶義將軍印呂子傳：「呂宣忠，字諒功，號樵菴，嘉興崇德人也。……錄其託志詩四首……此稿出徐有兼袖中，宣忠手書，尚非其獄中之作。有兼云：「其自序一篇素裁定，若預知不終者，當與諸稿並寄。」」（國壽錄卷三）